

Sr. Tico Kock na Promer Ministro Oduber

Promer Ministro ta kere cu por cualifica e promocion y Backpay di Nisbet como otro acto di corrupcion

ORANJESTAD (AAN) - Miembro di Parlamento Sr. R.S. Tico Kock relaciona cu e promocion di sr. Benny Nisbet a lanza un serie di preguntanan na Ministro di Asuntonan General.

Segun articulo III.7 di Constitucion y segun articulo 50 di Reglamento di Orden di Staten di Aruba sr. Kock a puntra Promer Ministro pa confirma cu sr. Benny Nisbet a haya un promocion di schaal 7 pa 11. Si Sr. Promer Ministro por confirma cu e promocion aki ta contra tur regla existente y contra conscho di Departamento di Asuntonan di Personal?

Cu si fuera di e promocion aki sr. Nisbet a haya tambe un back-pay di hopi miles di Florin y si por informa cuanto miles di Florin sr. Nisbet a ricibi.

Sr. Promer Ministro por splica e pueblo ta di unda ta saca e placa pa duna tur e regalonan aki manera tambe esun di mas di

trinta mil Florin na swa di sr. Promer Ministro? Si por confirma cu pa motibo politico a nombra mas di 400 hende caba den servicio di gobierno?

Otro pregunta cu miembro di parlamento sr. kock a haci ta si Promer Ministro por splica pueblo e suma adicional cu mester paga na salario mensualmente pa e mas di 400 personanan extra aki ta? Y si ta continua cu e derecho aki di placa di pueblo Gobierno a stop di cumpli cu su obligacion financiero na empresanan local?

Sr. Promer Ministro por confirma cu pa motibo di tur e malgastamento di placa, e luna aki gobierno lo no por cumpli cu e compromiso di paga Hulanda bek e suma di casi 30 Millon Florin cu gobierno anualmente mester paga bek na interes y aflossing?

Sr. Kock a puntra Promer Ministro cu si e por confirma cu na

mes momento cu ta plunder e caha di pueblo Departamento di Finanzas ta trahando ariba medida contra e pueblo cu mester worde introduci na cuminzamento di otro aña pa haya placa pa sigui cu e derecho?

Miembro di Parlamento Kock tabata kier sa tambe for di Promer Ministro ki dia e ta contesta e preguntanan cu el a haci encuanto e acto di supuesto corrupcion den cual a regala swa di Sr. Promer Ministro un suma di mas di 30 Mil Florin di placa di pueblo.

El a sigui bisa cu e kier pa Promer Ministro informa cu si e ta kere cu por cualifica e promocion y e back-pay di sr. Nisbet como otro acto di corrupcion y si Promer Ministro por confirma cu gobierno su maneho ta pa sigui cu tur e bagamunderianan aki te ora cu e bolbe sink Aruba por completo